

## Capitulu 12

### Induve u nome di Mirepoil s'allonga

Pensate forse ch'è persone maiò principia-  
vanu à dubbità si di qualcosa, è ch'elle facianu  
stu ragiunamentu simplice : « Ghjè sempre in  
issi lochi duve Tistù hè passatu a vigilia ch'elli  
spuntanu i fiori misteriosi. Dunque deve esse  
Tistù ; curemu lu. »

Ma pensate cusì sapendu ch'è Tistù avia i  
ditoni verdi. E persone maiò, à vi aghju digià  
detta, anu idee fatte è ùn imaginanu guasi mai  
ch'elle possu esiste altre cose chè ciò ch'elle  
cunnoscenu digià.

Ogni tantu ne spunta unu ch'è palesa un  
affare scunnisciutu ; omu principia sempre  
ghjuchendu lu si à a risa, qualch'è volta, omu u  
lampa ancu in prigiò ch'è scumove l'ordine di u  
sgìò Trunadisse, è po, dopu ch'ellu sia mortu,  
quandu omu s'accorghje ch'ellu avia ragiò, li

s'innalza una statula. Hè ciò chi omu chjama un geniu.

Quellu annu, ùn ci era in Mirepoil, nisun geniu per spiècà ciò chì ùn pò esse spiecatu. È u cunsigliu municipale era in pienu scumpigliu\*.

U cunsigliu municipale, ghjè un pocu cum'è a donna di pulizia d'una cità. Tocca à ellu d'assicurà si di a pulizia di i pavimenti, tocca à ellu à indittà u locu duv'elli ponu ghjucà i zitelli, quelli duve i mendichi devenu mendicà, è sapè duve lu ci vole à allucà l'autobussi a sera. Micca disordine, sopra à tuttu micca disordine.

Ma u disordine si stallava in Mirepoil. Ùn era più pussibile di prevede, da un ghjornu à l'altu, induve truvà un giardinu o un parcu. I fiori invadianu tutti i munimenti publichi. Sì un cunsigliu municipale si piecava davanti à tale fantasia, una cità ùn saria più una cità.

– Innò, innò è innò ! mughjavanu i consiglieri municipali di Mirepoil adduniti per una senza strasurdinaria.

Si parlava digià di sradicà tutti i fiori.

---

\* désarrois

U Sgiò Babbu intervense tandu. U Sgiò Babbu era assai ascultatu à u cunsigliu. Si mustrò, una volta di più, omu di decisioni rapide è energiche.

– Amichi, disse u Sgiò Babbu, avete tortu d’amuscià vi. D’altronde, hè sempre un periculu d’amuscià si contru à ciò chì omu ùn capisce. Nisunu trà di noi cunnosce u perchè di ste fiuriture subitanee. Sradicà i fiori ? À sapete voi induv’elli anu da rinasce dumane. D’altronde, ci vole à riccunoscela, ste fiuriture ci ghjovanu ben più ch’elle ci scumodanu. Nisun prigioneru scappa più. U quartieru di e capanne hè diventatu riccu. Tutti i zitelli di l’uspidale guariscenu. Perchè cuntrarià si ? Mettimu i fiori in lu notru ghjocu, è andemu di fronte à l’eventi invece d’esse à a so rimorca.

– Iè, iè, iè ! mughjonu i cunsiglieri. Ma cumu fà ?

U Sgiò Babbu cuntinuò u so discorsu.

– Vi prupongu una suluzione ardita. Ci tocca à cambià u nome di a nostra cità, è chjamala oramai Mirepoil-i-Fiori. Cun un nome simile, quale puderia esse stunatu di vede fiori spuntà

in ogni locu ? È dumane sè u campanile si trasformeghja in un mazzulu di lillà, st'imbelligimentu, puderiamu fà nice d'avè lu previstu da una bella stonda in lu nostru pianu di grandi travagli.

– Evviva, evviva, evviva ! Stridonu i consiglieri salutendu u Sgiò Babbu, sciaccamanendulu tutti uniti.

U lindumane, chì ci vulia à fà prestu, i consiglieri municipali tutti prisenti, seguitendu l'orfonu\*, seguitendu l'orfagni cundutti da dui preti incustumati cum'è una dumenica, seguitendu una delegazione di babboni chì rapresentavanu a saviezza, u duttore Mauxdivers chì rapresentava a scienza, un ghjudice chì rapresentava a lege, dui professori di cullegiu chì rapresentavanu a literatura è un permissiunariu in uniforma chì rapresentava l'armata, s'urganizzonu fendu tamantu curteghju. Andonu sinu à a gara. Tandù, sottu i sciaccamani d'un populu beatu, inauguronu u novu pannellu, scrittu in lettere d'oru : MIREPOIL-I-FIORI

Fù un gran ghjornu.

---

\* instrument de musique ancien

## Capitulu 13

### Induve omu cerca à distrae à Tistù

A Signora Mamma si facia ancu di più penseru chè i consiglieri municipali, ma per d'altre ragioni. U so Tistù ùn era più u listessu.

U sistema d'educazione imaginatu da u sgiò Babbu u rendia curiosamente seriu ; stava silenziosu ore sane.

– A chì pensi cusì ? li dumandò a Signora Mamma un bellu ghjornu.

Tistù rispose :

– Pensu chì u mondu puderia esse assai megliu chè ciò ch'ellu hè.

A signora Mamma pigliò una aria amusciata.

– Un sò micca idee di a to età, o Tistù. Vai à ghjucà incù Gimnasticu.

– Gimnasticu pensa cum'è mè, disse Tistù.

Sta volta, a Signora Mamma s'inzergò.

– Mughjò. Ghjè un culmine, parenu fole !  
Avà, eccu chì i zitelli piglianu l'avisu di i cavallucci !

Ne parlò à u Sgiò Babbu, chì disse ; Tistù hà bisognu di divertimentu.

– U cavallucciu, u cavallucciu, ghjè bè, ma ùn ci vole micca ch'ellu veca sempre listessi animali. Mandemu lu à visità u zoò.

Ma quì, Tistù ebbi torna una gattiva sorpresa.

S'era imaginatu u zoò cum'è un locu fatatu induve l'animali s'uffrianu à di per elli à l'ammirazione di i visitatori, una spezia di paradisu di e bestie duve u boà faccia u so sportu ingiru à l'anche di a giraffa, duve u cangurù mettia un ursucciu in la so stacca per purtà lu à spassighjà..... Pensava chì i sgiaguari, i bufali, i rinoceronti\*, i tapiri, l'acelli-liri, i pappagalli è i scimiotti battianu quì è quallà in ogni spezia d'arburu è di piante meravigliose, tale ch'elli sò pinti nantu à i libri di maghjine.

Invece, ùn vide à u zoò chè gabbie induve i lionu pilati durmianu incù tristezza davanti à scudelle viote, induve i trigri eranu serrati incù i trigri, è e scimie incù e scimie. Pruvò di dà un cunfortu à una pantera chì girava in tondu daretu à e so griglia è volse offre li una panetta.

---

\* rhinocéros

Un guardianu l'impedì.

– Hè pruibita, giuvanottu, state in daretu. Sò animali feroci, mughjò u guardianu in collera.

– Da duve venenu ? dumandò Tistù.

– Da luntanu luntanu. D'africa, d'Asia, è da ùn la sò induve !

– Li s'hè dumandata a permissione nanzu di purtà li quì ?

U guardianu pisò e spalle, s'alluntanò, murendu ch'è omu li ghjucava à a risa.

Ma Tistù ellu, riflettia. Si dicia prima ch'è guardianu ùn n'averia da fà stu mistieru postu ch'ellu ùn tenia caru l'animali ch'ellu curava. Pensava dinù ch'è l'animali avianu forse purtatu in lu so pillame qualch'è grana di u so paese, è sparghje le in giru à elli...

Nisun guardianu di zoò ùn pensa à impedì un zitellucciu di pone i so ditoni in terra, davanti à ogni gabbia. I guardiani credenu simplicemente ch'è à stu zitellettu quì, li piace à trascinà si in la polvera.

Eccu perchè, qualch'è ghjornu più tardi, un tamantu baobabu s'alzava in la gabbia di i lions, e scimie si lampavanu da liana in liana,

i nenùfferi si spannavanu in la bagnarola di u cuccudrillu. L'orsu avia u so ghjallicu, u can-gurù a so savana ; l'eroni\* i fiamminghi rosuli viaghjavanu à mezu à e canne è l'acelli di tutti i culori cantavanu indè i sepalaghji di ghjesu-minu gigante. U zoò di Mirepoil era diventatu u più bellu di u mondu, è i cunsiglieri municipali si spiccionu di fà la sapè à l'agenze di turisimu.

– Allora eccu chì avà, travagli ancu in la vegetazione trupicale ? Furtissimu o ciù, sì veramente furtissimu disse Mustaccione à tempu ch'ellu vide à Tistù.

– Ghjè tuttu ciò chè aghju pussutu fà per sti povari animali feroci, chì s'annuiavanu tantu, luntanu da indè elli, rispose Tistù.

---

\* les hérons